

# RAHSIA AL-QURAN -DARI SEGI ILMU DAN FALSAFAH

## KENAIKKAN SESUATU UMAT DAN KEJATUHANNYA

Maju mundur dan naik turun sesuatu umat adalah menjadi perkara biasa dalam masyarakat manusia tetapi tentulah ada sebab-sebabnya dan tentulah pula masa naik dan turunnya itu terhitung daripada hari-hari yang berperistiwa di dalam sejarah dunia. Hari-hari yang berperistiwa ini terkenal di dalam Islam dengan nama “Hari-hari Allah” yang dituntut supaya tiap-tiap ketua yang bertanggungjawab memberi ingatan dan menyedarkan kaumnya dengan hari-hari yang sangat-sangat besar ertiannya itu sebagaimana yang terbentang di dalam ayat 5 Surah Ibrahim, Firman-Nya:

“*Wa zakkirhum biayyumi Allah. Inna fi zalika laayatin likulli sobbarin syakur.*”

“...peringatkanlah mereka dengan hari-hari Allah bahawa kejadian yang demikian itu menjadi keterangan yang menyedarkan bagi orang-orang yang sabar, lagi bersyukur.”

(Oleh Abdulla Basmeh)

Ayat suci ini menceritakan perihal Nabi Musa

Alaihi Salam telah diutus Allah kepada kaumnya untuk memimpin mereka dari gelap gelita ke arah nur yang terang benderang dan untuk mengingatkan mereka dengan “Hari-hari Allah” sebagaimana yang telah disebutkan di atas atau lebih lengkap bunyinya :

- *Walaqad arsalna Musa biaayatina an ukhrija qaumika min zulumat ila an-nur wa zakkirhum bi ayyaum Allah, inna fi zalika laayati likulli sobbarin syakur.*

Sebelum menghuraikannya dengan lebih lanjut maka Al-Alamah Tantawi telah meringkaskan maksud surah Ibrahim itu kepada sepuluh perkara:

(1) Tuhan telah memulakan surah ini dengan menyatakan bahawa Ia telah menurunkan Quran ialah kerana mengeluarkan manusia daripada gelap kepada terang.

(2) Menyatakan bahawa tiap-tiap Rasul yang ajarkan kaumnya dengan bahasa yang diketahui oleh mereka.

(3) Menjelaskan bahawa Nabi Musa Alaihis Salam telah diperintahkan terlebih dahulu daripada Nabi Muhammad Sallallahu Alaihi Wasallam supaya mengeluarkan kaumnya daripada gelap kepada terang.

(4) Menyatakan demikianlah Nabi Muhammad telah mengeluarkan umatnya daripada gelap kepada terang melalui jalan yang telah diikuti oleh Nabi Musa dan telah mengingatkan umatnya dengan hari-hari Allah.

(5) Menerangkan cara Nabi Musa mengingatkan kaumnya iaitu diperingatkan mereka dengan peristiwa yang besar di dalam sejarah mereka yang di dalamnya mereka telah di selamatkan Allah daripada angkara Firaun.

(6) Menerangkan bahawa syukur kepada Tuhan itu mendatangkan limpah kurnia-Nya yang berlipat ganda, dan bahawa kufur kepada-Nya membawa azab seksa.

(7) Dan menyebutkan kepada mereka perihal bala bencana yang telah menimpa umat-umat purba kala yang engkar.

(8) Menyatakan bagaimana orang-orang kafir di antara mereka telah dibinasakan dan bagaimana balasan yang elok yang telah dikurniakan kepada Nabi-nabi disebabkan sabar dan tahan menderita dalam masa menuaikan kewajipan.

(9) Menjelaskan bahawa tiap-tiap seorang adalah bertanggungjawab terhadap dirinya sendiri, walaupun ia disesatkan oleh syaitan dan walaupun ia diperdaya oleh ketuanya atau sesiapa jua.

(10) Menerangkan bahawa ilmu pengetahuan apabila dikurniakan kepada sesuatu umat maka faedahnya akan meliputi umat itu turun-temurun.

Ringkasan ini boleh diuraikan dengan lebih lanjut apabila dikaji kejadian-kejadian langit dan bumi, dan di kaji bagaimana turunnya hujan, tumbuh-tumbuhan keluarnya buah-buahan, larunya kapal-kapal di laut, mengalirnya sungai-sungai, demikian juga bagaimana kejadian matahari, bulan dan lain-lain nikmat yang besar yang tidak terhingga itu. Penyudahnya surah ini telah ditutup dengan doa Nabi Ibrahim supaya janganlah hendaknya anak junjungannya menjadi pak turut atau pengikut sahaja lalu di jelaskannya bahawa Ia – Tuhan Yang Maha Kuasa – membentangkan segala yang disebutkan itu kepada hamba-Nya yang menggunakan akal fikirannya.

Bagaimana kita pada hari ini dapat mengingatkan orang ramai dengan hari-hari itu?

Soalan ini di jawab oleh Al-Alamah Tantawi katanya: Hendaklah diketahui bahawa surah ini sahaja memadai rasanya untuk menjadi petunjuk kepada umat Islam dengan syarat hendaklah kita menggunakan akal dan faham tatkala kita mengajarkan ajaran suci itu kepada orang ramai.

Bahkan satu ayat seperti yang di sebutkan itu cukuplah untuk mendatangkan bahagia kepada orang Islam, sekiranya kita dapat memahami tujuannya yang sebenar, lalu kita menghuraikannya dengan sejelas-jelasnya serta mengingatkan orang ramai dengan apa yang berada di sekeliling kita dan dengan apa yang terjadi ke atas umat kita, maka sudah tentu buahnya dapat kita menyelamatkan orang-orang kita daripada binasa.

Oleh kerana Nabi Musa tatkala mengingatkan umatnya menurut apa yang sesuai dengan mereka, maka begitulah pula hendaknya alim ulama dan ketua-ketua yang bertanggungjawab di dalam kalangannya Islam mengingatkan kaumnya dengan hari-hari yang berperistiwa yang mengenai dan pernah di tempuh oleh umat Islam sendiri.

Di sini Al-Alamah Tantawi telah mengumpulkan sepuluh kejadian yang bersesuaian dengan kemajuan dan kemunduran umat Islam lalu berkata:

Dengan sepuluh kejadian yang berperistiwa inilah saya

mengingatkan umat Islam:

Pertama – tentang kehinaan bangsa Arab yang telah merasa tindasan penjajah-penjajah – Rom, Parsi dan Habsyi – sebelum kebangkitan Islam.

Kedua – tentang kemulian yang mereka dapat mencapainya sesudah mereka memeluk Islam.

Ketiga – tentang luasnya negeri-negeri yang telah ditakluk mereka di timur dan di barat.

Keempat - tentang tersiarinya bahasa Arab dengan luasnya di timur dan di barat.

Kelima – tentang sikap mereka menterjemahkan segala jenis ilmu pengetahuan dan bagaimana kepandaian mereka telah memuncak dalamnya.

Keenam – tentang jatuhnya ilmu pengetahuan di negeri-negeri Islam setelah membumbung tinggi beberapa lamanya.

Ketujuh – tentang penindasan yang telah dilakukan oleh orang-orang Islam kepada ulama yang mencintai ilmu falsafah seperti “Ibnu Rushd” dan rakan-rakannya.

Kelapan – tentang bagaimana ilmu pengetahuan Islam telah berpindah ke Eropah melalui murid-murid “Ibnu Rushd”

Kesembilan – tentang bagaimana orang-orang Eropah telah mengatasi orang-orang Islam di dalam segala jenis ilmu pengetahuan pada hari ini.

Kesepuluh – tentang keruntuhan kerajaan-kerajaan Abassiyah di timur dan “Umayyad” di barat, dan kebinasaan yang menimpa umat Islam di tanah Sepanyol, dan juga bagaimana kebinasaan yang telah menimpa umat-umat yang jahil seperti penduduk asli Amerika dan penduduk asli Australia. Terjadinya segala-galanya ini ialah kerana mereka belum bangun dari kelalaian mereka.

Inilah dia peringatan – peringatan yang berperistiwa besar yang akan saya mengingatkan orang-orang Islam dengannya, saya akan sebutkan dengan secara ringkas supaya mereka dapat mengetahui kedudukan mereka dalam zaman yang akan datang dan supaya mereka dapat mengukur masa yang akan datang dengan masa yang telah lalu sebagai berpandu kepada Nabi Musa Alaihisalam yang kerananya dan kerana Nabi-nabi yang lain juga pun

berfirman kepada junjungan kita :

“Fabahdahum iqتاداھ”

(Berpandulah engkau Muhammad dengan petunjuk yang diikuti oleh mereka – yakni Nabi-nabi itu)

Melalui lidah Rasul-Nya Muhammad Sallallahu Alaihi Wasallam maka Tuhan azzawajalla telah mengingatkan orang-orang Islam di dalam surah Al-Anfal dengan beberapa perkara yang sesuai dengan mereka tatkala mereka berjuang di medan pertempuran “Badar” yang mahsyur di dalam sejarah perjuangan Islam.

Sekarang biarlah saya huraikan sepuluh perkara yang saya telah pilihkan itu tetapi di sini seorang sahabat saya telah mencelah, katanya: Nampaknya tuan telah melarap panjang, apa ada kena mengena dengan sepuluh perkara yang tuan hendak huraikan itu dengan ayat : *Wazzakirhum bi ayyaum Allah?*

Jawab saya: Sekiranya kita mendengar seorang Muslim membaca ayat yang diwajibkan sembahyang : Inna as-solat kaanat ala al-mukminin kitaban mauqufa – (bahwasanya sembahyang itu telah difardhukan di atas orang-orang yang beriman dengan berwaktu) iaitu berulang-ulang dibaca akan dia pagi dan petang adakah bermakna orang itu terhitung sudah mengerjakan sembahyang? Demikiannya juga halnya zakat, haji dan perintah-perintah yang lain. Ulama-ulama Islam telah mengarangkan beribu-ribu kitab yang menghuraikan perihal sembahyang, maka demikian jugalah ayat itu lebih penting dihuraikan dengan seberapa lanjutnya dengan mengingatkan umat Islam akan segala peristiwa yang baik dan yang buruk – yang telah ditempuh oleh datuk nenek mereka, supaya mereka bersedia pula mengawal diri daripada segala keburukan dan mara terus menjadi segala kebaikan yang lengkap sempurna.

Demikian juga sesuatu kerajaan apabila dia jahil akan segala yang menghalanginya dan tidak pula dia insaf akan kejadian-kejadian yang telah di lalui dan yang telah dilalui oleh kerajaan-kerajaan yang terdahulu, maka lambat bangat dia akan binasa dan akan di lapah dan di percabang-cabangkan oleh musuhnya.

Sahabat saya itu bertanya lagi: Bagaimana tuan tergamak menyebut bahawa mengarang kitab dalam perkara ini

lebih penting daripada mengarang dalam perkara sembahyang?

Jawab saya: Tuan akan mengatahui daripada kejadian yang telah menimpa orang Islam terutama penderitaan yang telah dirasai oleh orang-orang Islam di tanah Sepanyol setelah mereka mengikat beberapa surat perjanjian dengan orang-orang Kristian. Demikian juga tuan akan mendapat jawabnya tatkala mengetahui akan segala bala bencana yang telah menimpa umat Islam di negeri Khwarizm (dalam kawasan Rusia sekarang) yang telah dilanggar dan dipunahranahkan oleh orang-orang Tatar dan Mongol dengan sekejam-kejamnya. Disebabkan kerajaan Khwarizm yang dipimpin oleh rajanya “Kathib Arsalan” jahil akan kekuatan musuh yang menjadi jirannya. Demikian juga kemalangan yang telah menimpa umat Mesir tatkala mereka dilanggar oleh orang Perancis dalam permulaan kurun hijrah yang ketiga belas disebabkan mereka jahil akan kekuatan musuhnya bahkan kerana mereka jahil akan perintah-perintah agama sendiri. Islam telah melunaskan cara berkuarantin (mengasingkan diri daripada orang-orang yang berpenyakit yang berjangkit) bahkan telah diamalkan oleh Saidina Umar pada kira-kira seribu tiga ratus tahun dahulu tetapi, orang-orang Mesir, barulah mula mengetahui melalui orang Perancis! Segala-galanya ini wahai sahabat akan dijelaskan kelak. Dengan ini jelaslah yang sebenar-benar agama Islam belum dikaji dengan sepenuhnya dan umat Islam sekarang ini sentiasa berhajat kepada ketua-ketua yang sanggup mengingatkan dan menupukan semangat kesedaran supaya makin banyak orang-orang kita sanggup mengharungi dan mempelajari tiap-tiap jenis ilmu pengetahuan. Segala jenis ilmu pengetahuan itu sebagaimana yang sudah sekian maklum adalah menjadi fardhu kifayah menuntutnya, bahkan setengah ulama, memandang pahalanya lebih besar daripada pahala fardhu ain, kerana faedahnya meliputi seluruh manusia dan fadhu ain sendiri tidak akan sempurna melainkan daripada banyak perkara yang terhitung menjadi fardhu kifayah.

(Sepuluh perkara yang telah dipilihkan oleh Al-Alamah Tantawi seperti yang tersebut di atas akan dihuraikan olehnya dalam bilangan yang akan datang.)